



Ženska mreža BiH

Sarajevo, 10.02.2013.

Broj:

Javno reagovanje
ŽENSKE MREŽE BOSNE I HERCEGOVINE

**PROBLEM NIJE SAMO U NASILJU,
PROBLEM JE U TOME ŠTO JE MORALO DOĆI DO NASILJA**

Samim tim da žene predstavljaju jednu od najmnogobrojnijih marginalizovanih grupa u bh. društvu i čija prava se ne poštuju, Ženska mreža BiH ovim putem daje ***punu podršku građanima i građankama***, koji/e su prisiljeni/e da svoja prava traže na ***javnim protestima***. Bez obzira da li je riječ o mladima, penzionerima i penzionerkama, trudnicama i porođiljama, o osobama sa invaliditetom, zanemarenim i prevarenim radnicama/cima, ženama i muškarcima koji/e ne mogu da ostvare pravo na odlazak u penziju, nacionalnim i seksualnim manjinama ili bilo kojoj drugoj grupi i pojedincu/ki, za sve njih Bosna i Hercegovina je postala zemlja koja im ne garantuje osnovna ***socijalna, ekonomska i politička prava***.

Protesti su samo manifestacija činjenice, da politički sistem BiH i različiti nivoi vlasti služe samo političkim elitama i njegovim sljedbenicima/ama i da je kao takav neodrživ.

Ženska mreža BiH ***osuđuje nasilje i vandalizam***, kojeg su ispoljile pojedine grupe demonstranata/kinja. Takođe, ***osudujemo i nasilje nad privedenim demonstrantima/kinjama***. Nasilje nikad ne može biti rješenje.

Ženska mreža BiH takođe poziva bh. medije i javnost da prestanu sa jednostranim predstavljanjem događaja u proteklih nekoliko dana. Mladići i djevojke koji su u proteklih nekoliko dana, a naročito u petak, uništavali imovinu i u našim gradovima stvorili osjećaj totalne nesigurnosti ***nisu nikakvi huligani/ke i vandali/ke***, nego su proizvod bosanskohercegovačke države i društva. Ovdje se radi o djeci, braći i sestrama, komšijama, učenicima i učenicama, studentima i studenticama - onoj generaciji, kojoj su postdejtonska politika i njene političke stranke oduzele ne samo prošlost i sadašnjost, nego najvjerovatnije i budućnost.

Ženske nevladine organizacije u Bosni i Hercegovini godinama aktivno djeluju na sprečavanju i suzbijanju svih oblika nasilja i diskriminacije. I zbog toga, pozivamo vlasti i političke elite Bosne i Hercegovine da:

- ne ***prebacuju potpunu odgovornost*** za ovo stanje sa sebe na demonstrante/kinje, jer problem nije samo u manifestaciji nasilja, nego u tome kako je došlo do kreiranja ovakvih društvenih okolnosti;
- se ***adekvatno procesuiraju protivzakonito nasilje nad privedenim demonstrantima/kinjama***; odgovornost ne može biti na policiji nego je i dalje kod političkih elita, naročito kod kantonalnih vlasti i vlasti Federacije BiH;
- rade na kreiranju ***obrazovnog sistema***, koji će promovisati ljudska prava marginalizovanih grupa i nenasilje;
- ***grade jedan pravedniji socijalni i zdravstveni sistem***, kako bi se svima građanima i građankama omogućio dostojanstven život.

Ženska mreža BiH